

**Uunga siunnersuut: Tapersiissutitalimmik inissialiortiternermut
taarsigassarsititsisarneq pillugu Inatsisartut inatsisaata allanngortinnissaa pillugu**

Inatsisartut inatsisaat

(Atuisarnerup erseqqissaaffigenera)

(Ineqarnermut Attaveqaasersuutinullu Naalakkersuisoq)

Saqqummiussissut

(Ineqarnermut Attaveqaasersuutinullu Naalakkersuisoq)

Siullermeerneqarnera

Naalakkersuisut sinnerlugit matumuuna Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaata allanngortinneqarnera pillugu Inatsisartut inatsisissaatut siunnersuut saqqummiuppara.

Allanguutissatut siunnersuummi inissiaq Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat naapertorlugu taarsigassarsititsinikkut tunniunneqartoq, taamaallaat piginnittumit taassumalu inoqutigivinit imaluunniit attartortoqarpat attartortunit atorneqarsinnaanera erseqqissarneqarpoq. Inissiamik piginnittoq taassumalu inoqutai imaluunniit attartortoqarpat attartortoq inissiamit inuussutissarsiummik mikinerusumik suli ingerlatsisinnaassapput, inissiaq najugaqarfittut pingaarnertut atorneqarpat.

Siunnersuut ineqarneq pillugu aqqissuusseqqinnerup atuutilersinneqarneranut ilaavoq aamma *Ineqarnermut aningaasalersueriaatsinik nalilersuinermit* innersuussutit tunngavigineqarput. Innersuussutit kommuninik oqaloqateqarnerit aamma naalakkersuisoqarfiit inatsimmik paasisimasaqarnerat, tassunga ilanngullugu naalakkersuisoqarfiup Kommuneqarfik Sermersuup ineqarnermut suliasaqarfimmi suleriaasianik nakkutilliinera tunngavigalugit suliarineqarput.

Ataatsimut isigalugu inatsisit ataatsimut isigalugit siunertatut ingerlasut taassumalu ilusilersornera innuttaasup Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat naapertorlugu inissianut tapiissuteqartarnermut taarsigassarsinissaanut akornutunik pilersitsisuunngitsoq aalajangiunneqarput.

Oqartussaasutut Kommuneqarfik Sermersuumik nakkutilliineq tunuliaqutaralugu aalajangiunneqarpoq pisortanit taarsigassarsilluni inissiaqartoq, najugaqarfissatut atornagit siunertanut allanut atorneqartunik. Pisortat inissianut aningaasaliisarnernut aqqissuussaannik tamanna siunertaanngilaq. Aningaasat inuiaqatigiit inissianik pilersuinerup annertusinissaanut aningaasaliissutigisaat inissiat najugaqarfigineqarsinnaasut amerlanerulernissaannut aamma

iluqaataassapput. Taamaattumik pisortanit taarsigassarsilluni inissiat taamaallaat najugaqarfissatut atorneqarnissaat inissianut aningaasalersuisarnermut suliassaqarfimmi inatsimmi ataatsimut isigalugu erseqqissarneqassasoq siunnersuutigineqarpoq.

Taamatut oqaaseqarlunga Naalakkersuisut sinnerlugit immikkoortoq inatsisartuni sularisassanngortippara.